

02 December. 2025

समे .18:15 Hrs

<><><><><><>

Headlines

- मतदाता सूचिएं दे बशेश व्यापक नजरसानी आहले मामले पर विपक्ष दे हंगामे दे चलदे लोकसभा दी कार्रवाई दिन भरै लेई स्थगित करी दित्ती गई।
- मुख्मन्त्री उमर अब्दुल्ला होरें कल मंत्रिमंडल दी महत्वपूर्ण बैठक सद्दी ऐ। आरक्षण नीति च बड्डे बदलाव दी मेद।
- मुख्मन्त्री होरें राजौरी च चला'रदे विकास कम्में दी समीक्षा कीती।
- मुख्म सचिव अटल डुल्लू होरें जम्मू युनिवर्सिटी ते कश्मीर युनिवर्सिटी, दौनं कन्नै जुडे दे संगीत ते कला सरबन्धी संस्थानें दे आधुनिकीकरण पर जोर दित्ता।
- ते क्रिकेट च जम्मू-कश्मीर नै चंडीगढ़ गी सईद मुश्ताक अली ट्रॉफी इलाइट ग्रुप दे मैच बी च 29एं रन्जें कन्नै हराया।

<><><><><><>

LS-Adjournment

बशेष व्यापक नजरसानी आहले मामले दे लम्कोने करी अज्ज लोकसभा ते राज्यसभा गी दिन भरै लेई स्थगित रक्खेआ गेआ। एह्दे शा पैहले सदन गी दो बारी स्थगित कीता गेआ ह। विपक्ष बशेष व्यापक नजरसानी आले मामले पर बैहसू दी मंग करा'रदा ह। 2 बजे दुए स्थगन मगरा जिसलै लोकसभा बैठी, विपक्षी सदस्य फही सदन दे मझाटै आई गए ते एसआईआर खलाफ नारे लान लगी पेय जेह्दे मगरा सदन दिन भरै लेई स्थगित करी दित्ता गेआ। तोआई, राज्यसभा बी विपक्ष आसेआ एसआईआर समेत बक्ख-बक्ख मुद्दें पर डंड रौली पाने करी 2 बजे तगर स्थगित कीती गई।

<><><><><><>

Cabinet-Meeting

मुख्मन्त्री उमर अब्दुल्ला होरें कल कैबिनेट दी इक उच्ची सतह दी बैठक सद्दी ऐ जेह्दे च मेद कीती जा'रदी ऐ जे सरकार नौकरियें ते शिक्षा संस्थानें च ओपन मेरिट कोटा बदाने सने बड्डे फैसले लेई सकदी ऐ। आकाशवाणी जम्मू संवाददाता दी रिपोर्ट मुजब कल आहली इस बैठक दा मुख्म एजेंडा आरक्षण नीति होई सकदी ऐ। एह् बैठक जम्मू आहले सिविल सचिवालय च बड्डलै 9 बजे लग्गोग ते एह् हाल च गै परतियै बहाल होए दे दरबार मूव दे बाद कैबिनेट दी पैहली औपचारिक बैठक होग।

<><><><><><>

मुख्यमंत्री उमर अब्दुल्ला होंरें अज्ज राजौरी दे डाक बंगले च इक जायजा बैठक दी अध्यक्षता कीती। मगरा पत्रकारें कन्नै गल्लबात करदे होई मुख्यमंत्री होंरें शिड़कें दी स्थिति बारे पुच्छे गेदे इक सोआलै दा परता दिंदे होई आखेआ

एह्दे शा पैहले मुख्यमंत्री होंरें पुंछ च एन.सी दे विधायक एजाज जान हुं'दे निवास पर जाइयै उंदी मां ते डीडीसी सदस्य अतिका जान हुंदी मौती पर बसोस प्रगट कीता। मुख्यमंत्री हुंदे कन्नै मंत्री जावेद अहमद राणा, मुख्यमंत्री हुंदे सलाहकार नासर असलम वाणी ते चौधरी मोहम्मद अकरम सने कई सीनियर लीडर बी मौजूद हे। इस मौके पर मुख्यमंत्री होंरें इलाके दे विकास च अतिका जान हुंदे योगदान दी सराहना कीती।

<><><><><><>

Farmers Tour

उधमपुर च बागवानी विभाग आसेआ 35 करसानें गी अपने हुनर ते ज्ञान गी बधाने आस्तै केंद्र प्रायोजित स्कीम दे तैहत 5एं दिनें दे सिखलाई कार्यक्रम च हिमाचल प्रदेश ते पंजाब भेजेआ गेआ ऐ। उधमपुर वेस्ट थमां विधायक पवन कुमार गुप्ता होंरें मुख् बागवानी अधिकारी ब्रिगेडियर वल्लभ गुप्ता हुं'दी मौजूदगी च इस दल गी झंडी दस्सियै रवाना कीता। एह् टूर प्रोग्राम, करसानें गी होंनें खेत्तरें च राई-बाई सरबंधी अज्जे-कल्लै दियें तकनीकें ते तौर-तरीकें बारे जानकारी उपलब्ध करोआने दी इक व्यापक पैहलकदमी दा हिस्सा ऐ। इक कार्यक्रम च करसानें गी पर्यावरण अनुकूल खेतीबाड़ी दे तौर-तरीकें च सुधार लेई मौके पर गै सिखलाई दिती जाह्गा। आकाशवाणी समाचार कन्नै गल्ल करदे होई उधमपुर दे मुख् बागवानी अधिकारी ब्रिगेडियर वल्लभ गुप्ता होंरें आखेआ

जिसलै के दौरे पर जा'रदे इक करसान विशाल नै इस चाल्ली अपने बचार साहडे कन्नै सांझे कीते।

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू 4 दिसम्बर गी वन्य जीवन संरक्षण सरबंधी ध्याडे दे मौके पर 25एं मिन्टे दी इक विशेष चर्चा प्रसारित करने जा'रदा ऐ जेह्दा विशे ऐ “जागरूकता ते शिक्षा राएं वन्य जीवन संरक्षण”। एह् कार्यक्रम वीरवारें दिनें 12 बजे प्रसारित कीता जाह्गा। इस विशेष प्रसारण च साढे परौहने होडन Chief Wild Life Warden ते Principal Chief Conservator of Forest. Sarvesh Rai जेह्दे इस विशे पर अपने माहिराना विचार श्रोताएं कन्नै सांझे करडन। कार्यक्रम दी मेजबानी साढियां एंकर श्रूति खजूरिया होर करडन। एह् कार्यक्रम साहडे इस्सै चैनल मीडियम वेव 303 मीटर यानि 990 किलोहर्टज ते एफ.एम 100 अशारिया 3 मैगाहर्टज पर प्रसारत कीता जाह्गा।

<><><><><><>

मुख्य सचिव अटल डुल्लू होरें अज्ज जम्मू युनिवर्सिटी ते कश्मीर युनिवर्सिटी कन्नै जुडे दे संगीत ते कला सरबन्धी संस्थानें दे विस्तार ते सुधार सरबन्धी योजनाएं दी समीक्षा लेई इक बैठक दी अध्यक्षता कीती। इस दरान मुख्य सचिव होरें जम्मू-कश्मीर दे नौजोआनें दे कलात्मक ते संगीत कन्नै जुडे दे हुनर गी नखारने च इनें संस्थानें दी महत्वपूर्ण भूमिका पर जोर पाया। डुल्लू होरें आखेआ जे इनें दौनें संस्थानें गी अज्जै-कल्लै साब्बै आधुनिक तर्ज पर विकसित कीता जाना लोडचदा ऐ तां जे विद्यार्थियों लेई इक माफक शैक्षणिक माहौल यकीनी बनाया जाई सकै। उनें मौजूदा ग्रैजुएशन कोर्स प्रोग्रामें दी समीक्षा कीती ते युनिवर्सिटियों गी सलाह दित्ती जे ओह पोस्ट ग्रैजुएशन प्रोग्रामें सने बाद्दू कोर्स शुरू करने पर विचार करना।

<><><><><><>

LG-Ladakh

लद्दाख दे लेफ्टिनेंट गवर्नर कविंद्र गुप्ता होरें अज्ज अपने जन्म ध्याड़े दे मौके पर कटड़ा स्थित श्री माता वैश्वो देवी दरबार जाइयै मत्था टेकेआ। इस दरान मीडिया कन्नै गल्लबात करदे होई कविंद्र गुप्ता होरें लद्दाख च चला'रदे परिवर्तनकारी ते ढांचागत विकास पर लोऽ पाई। उनें आखेआ जे औने आहले ब'रें च जोजीला सुरंग दे पूरा होने कन्नै लद्दाख दा देसै दे बाकी हिस्सें कन्नै हर रूतै दरान संपर्क कायम होई जाहगा। इस गैंऽ कन्नै उत्थूं दे बसनीकें गी बड़ा मता फायदा होग ते कम्म-बपार गी बी बढ़ावा थ्होग। उनें आखेआ

<><><><><><>

Dragon Fruit

कठुआ जिले दे नगरी ग्रां च ड्रैगन फ्रूट दी कामयाब खेती बागवानी दे क्षेत्र च सब्भनें लेई इक मसाल दे रुपै च उभरियै सामने आई ऐ। HADP स्कीम तैहत माली समर्थन कन्नै दंऊ बरे पैहले शुरू कीते गेदे इस प्रोजैक्ट कन्नै मकामी समुदाय गी माली तौरा पर काफी फैयदा होआ करदा ऐ ते कन्नै नौजवानें गी बागवानी ते राई-बाई सरबन्धि होरनें क्षेत्रें च कम्म करने लेई प्रेरणा बी हासल होआ करदी ऐ। अधिकारियें दस्सेया जे इस चाल्ली दे कम्में कन्नै राई-बाई कन्नै जुडे दे क्षेत्रें च बन्न-सबन्नता पैदा करने- नमियें काडुं गी बढ़ावा देने ते ग्रामीण आजीविका गी मजबूती देने च मदद थ्होंदी ऐ। ड्रैगन फ्रूट दी रड करने आहले युवा उद्यमी मयंक गौतम नै अपनी कामयाबी कन्नै खित्ते दे होरनें केंई नौजवानें दा बी इत्त भेठा अगड़े बध्ने लेई दिल बधाया ऐ।

<><><><><><>

Brig Usman Cricket

भारतीय फौज दी नौशेरा ब्रिगेड नै राजौरी दे नौशेरा च आर्मी स्टेडियम च ब्रिगेडियर उस्मान प्रीमियर लीग-2025-26 दा शुभारम्भ कीता। बड़े उत्साह कन्नै 80 ब्रिगेड दे कमांडर ब्रिगेडियर कौशल कुमार होरें इस टूर्नामेंट दा अधिकारिक तौरा पर उदघाटन कीता। मुल्खा लेई अपनी जिंदू गी कुर्बान करने आहले शहीद ब्रिगेडियर मोहम्मद उस्मान हुं'दे चेते च आयोजित इस प्रतिष्ठित कार्यक्रम च जिले भरै दियां 16 टीमा हिस्सा लै'रदियां ना। नौजोआनें च खेडु भावना गी प्रोत्साहित करग ते समुदाय दी भागीदारी गी बी बढ़ावा देग। एह्दे कन्नै कन्नै गै

शहीद ब्रिगेडियर उस्मान हुंदी हिम्मत ते विरासत दा सम्मान करदे होई पूरे खेतर च युवा एथलीटें गी प्रेरित कीता जा'रदा ऐ। आकाशवाणी समाचार कन्नै गल्ल करदे होई इक खडारी नै आखेआ

<><><><><><>

JK –Govt. Awards

जम्मू-कश्मीर सरकारै 2026 दे स्टेट अवार्ड- जेहड़े गणतंत्र दिवस दे मौके पर दिते जाने न- लेई नामजदगियां मंगियां न। आम प्रशासनिक विभाग आसेया इस बरे जारी इक अधिसूचना मुजब एह अवार्ड ब्हादुरी- साहित्य- कला- कारीगरी- समाज –सुधार- सार्वजनिक सेवा- लाइफ टाईम एचीवमेंट- खेडु- मीडिया- पर्यावरण- उद्योगिक उद्यमता दे क्षेत्र च दिते जाने न। इंदे लेई नामजदगियां समाजी ते खेडु संगठन- गैर-सरकारी संगठन- युनिवर्सिटियां- प्रशासनिक सचिव ते जम्मू-कश्मीर कला संस्कृति ते भाषा अकादमी आसेया भेजियां जाई सकदियां न। एहदे लेई खीरी तरीक 15 दिसम्बर 2025 रखी गेदी ऐ।

<><><><><><>

JK-Mushtaq Ali

जम्मू-कश्मीर नै चंडीगढ़ गी सईद मुश्ताक अली ट्रॉफी एलाइट ग्रुप बी दे मैचें च 29एं रन्जें कन्नै हराया। एह मैच कोलकाता च जादवपुर विश्वविद्यालय दे कैंपस च खेढेआ गेआ। चंडीगढ़ नै टॉस जित्तियै पैहलें फील्डिंग करने दा निरना लैता। जम्मू-कश्मीर नै पैहलें बल्लेबाजी कीती ते इक शानदार स्कोर बनाई लेआ जेदे च यावर हुसैन दा अर्धशतक शामिल ऐ जिनें 36एं गेंदें च 57 रन्ज बनाए। चंडीगढ़ दे बल्लेबाज लक्ष्य तगर पुज्जने लेई संघश्र करदे रेय पर टीम 29एं रणजें कन्नै हारी गेई। एह जित्त जम्मू-कश्मीर लेई इक होर सार्थक नतीजा ऐ।

<><><><><><>

VC-CVJ

वरिष्ठ पत्रकार ते मन्ने परमन्ने दे लखारी ओ.पी शर्मा होर केंद्री विश्वविद्यालय दे उपकुलपति संजीव जैन हुं'दे कन्नै मिले ते उ'नेंगी अपनी किताब “Doyens of Dogri Literature” भेंट कीती। उपकुलपति होरें श्री शर्मा हुंदिएं कोशिशें दी सराहना कीती जे उनें डोगरी भाशा दे मन्ने-परमन्ने दे लेखकें गी इक्कले मंच पर चित्रें समेत प्रस्तुत कीता। उनें आखेआ जे केंद्री विश्वविद्यालय जम्मू राष्ट्री शिक्षा नीति-2020 तैह्त्त भारती भाशें गी बढ़ावा देआ'रदा ऐ।

<><><><><><>